

推

篷

寤

語

推篷寤語卷之四

雲間李豫亨 元薦甫

原教篇

下

原因果之教

人知天地之爲天地而不知父母之爲真天地蓋人賴父母一點精氣交媾而成頃刻之中富貴貧賤壽夭與夫昏明強弱之資稟俱定於此不可移易父母於此事通曉則其子嗣於此事獨明良弓之子必易爲箕良冶之子必易爲裘非待有所強而能也今人有

一生讀書不遇而其子竟取科第者非必天以此償之也實其有生之初於此筆翰之事獨明了也獨能明了以故取青紫亦易然矣然則父母之爲子計又遠者豈可不自己之修爲始之而子嗣承其祖父之業亦思所以竟其未了之志哉

因報之說出於釋氏其理似無而實有吾將譬之如寤時之想性所存也寐時之夢亦性所存也夢中所爲之事皆平日之所習爲所見之人多平日之所習識人處世間偶經耳目尚存性中不失況今生結緣旣熟其爲來生張本無疑心之根本爲因心之所起爲

緣所成爲果惡緣妄緣可以除去善緣真緣可以封殖白公詩云前歲種桃核今歲爲花樹其理不爽

釋老尊重彼教不啻萬鈞儒者之於吾教反不相及或以字紙踐踏者有之宋王沂公其父見字紙遺墜必掇香湯洗燒之一夕夢宣聖拊其背曰汝何敬重吾字紙之勤也恨汝老矣無可成就他日當令曾參來汝家受生顯大門戶未幾果生一男遂命名曾及狀元第嗟嗟雖不必覲報而然理固當如此已

人有樹藝之功則有采收之效自然之理也樹藝者卽因采收者卽果故釋氏謂之因果吾聞爲其說者曰

世間法相或容規求規避出世間法妙如影響之應形聲決定無差又曰在陽之報疎而速在陰之報密而遲雖不可測知但現今處世亦有因果爲善降祥爲惡降殃敬人者人恒敬之愛人者人恒愛之

佛家謂種瓜得瓜種菓得菓故謂之因果予舉所聞數事以證有一村嫗誤跌其孫其子驅之入水死明年其子夫婦方出其孫熨火延其衣立焚幾燼夫婦奔歸救之投諸水亦死有一豪士謀其姻家之產得之居處不數年更爲伊姻家所謀有一子壻早孤得其婦翁資力甚盛旣而乏嗣竟死貲產爲其子壻所得

不異得於婦翁云噫現前報應不爽毫髮觀此可以警也夫

法苑珠林云人之受恩譬如種穀種雖因地非雨不生洎至穀成不可只言因地不言雨恩也今之受恩者不惟不以恩報而反報以讎可怪也殊不曉天理昭彰人心難昧故感恩之人最爲近道非感恩便能近道卽其感恩一念之仁而其平日履踐可知矣

老子曰旣以爲人已愈有旣以與人已愈多大抵臨財多至吝嗇真實樂施福德自此而長豈不愈有愈多乎李謙者富室也歲歉出粟千石貸人對衆焚券全

活萬計或曰子陰德太矣公曰陰德如耳鳴已自知  
之人無知者子今已知何足爲德然則樂施濟人當  
施於不報之地若今日行善明日覲報又何功德之  
有

東坡與朱鄂州論不舉子書云天麟言岳鄂間田野小  
人例只養二男一女過此輒殺之尤諱養女以故民  
間少女多鰥夫初生輒以冷水浸殺有神山鄉百姓  
石揆者連殺兩子去歲夏中其妻一產四子楚毒不  
可堪忍母子皆斃報應如此而愚人不知創艾天麟  
每聞其側近有此輒馳救之量與衣食全活非一旣

旬日有無子息人欲乞爲子親亦不肯以此知父子之愛天性故在特牽於習俗耳今時浙中亦有此風不特岳鄂也是在長民者一加意禁戢全活無限其陰德尤十倍於全活壯夫也

人處塵勞不能無短然短自其短于我何與在我只消一箇不聞不知則其短終不自我而彰苟或一語彰之則其語不免傳播聞望自此減素守自此隳詰此之由咎當誰執是以君子不談人之短

彼以惡來我以善應苟心非木石理無不感但患處之不恒弘之不積耳苟能每事思忍則悔吝消於現世

福報顯於將來

德之與福其機相爲桴感若無德而受福則福亦禍也  
有德而受禍則禍亦福也國語云德福之基也無德  
而受福猶無基而厚墉也其壞有日矣君子不可辭  
禍而徼福宋人之犢塞翁之馬豈可常理觀哉

天道福善禍淫殃慶各以類至間有爲善得惡爲惡得  
善或者修省之念從而怠焉是未明夫熟與未熟之  
論耳道經曰取小所以就大積一所以成億易稱餘  
慶必歸積善大抵善貴乎積知之不可不爲爲之不  
可不力譬如種物初雖至微灌溉培植不見其長有

時而大當知於日用間誠不可以小善爲無益而弗爲也

天地之間惟一感應心吾心也無欠無假感之在我應之在我故善者常福不善者常禍感而爲應應復爲感循環無端各以類至心與道混隨感隨應使人人果能以善爲感應根則諸福之物皆其心官主之矣必外心而求之冥漠之間哉

用知如水水濫則溢用勇如火火烈則焚故知勇有時而困也或有因之以自害者語有之水能載舟亦能覆舟又曰不戢將自焚也故多而不溢積而不焚者

其惟君子之德乎故德善積而不苑其德彌積其服  
彌廣其行彌遠而不困

凡人有吉氣則有凶氣與俱凡人有福氣則有禍氣與  
俱有生氣則有死氣與俱但所顯見有先後耳故曰  
福兮禍所倚利兮害所伏非寓言也蓋天地間善惡  
二氣常不相離受一種好氣必有一種不好氣帶來  
故古有三尸蟲之說謂魂好生魄好死每伺人過惡  
以報上帝令人速死故福過災生利盡害至者非偶  
然也君子兢兢戒謹扶陽抑陰正欲抑退是不善之  
炁耳若窮欲滅理是使三尸跳梁而萬神悲泣豈非

速禍之道哉

世有信口語而語不乖信意爲而事常勝不可與言心  
量才量也豈其識達群類智周萬物而能然哉惟福  
量有以致之也且福非有像量何所依吾常以無像  
之福求其無所依之量曾無絲毫之差非有神見蓋  
常以事觀之也使有人焉外乏口體之奉內嬰疾苦  
而無所告者其福量自不足以周一身也或啼飢號  
寒猶未已而禍辱駢集至若鷄犬不得寧者其福量  
不足以周一家也且福備乎已則身安福備乎衆則  
家齊以至爲國爲天下靡不本乎福也世之昧者不

責已之福量有所不周而怨人之不我順猶瞋者咎  
聲之不及乎耳瞽者咎色之不及乎目何愚之甚哉  
名利場中彈指便過還有於自己分上做得些工夫者  
乎如或未然卽是空來人世浪走一遭於佛經所謂  
願我壽命長勤行一切善願我福德盛廣濟一切人  
之說皆蹉過也不亦可惜耶

唐巖州推官楊旬積累陰騭其子將入試夢一神曰汝  
積陰德將汝子名改作楊椿納卷吾當助汝子果得  
第次年赴省試椿夢一神曰今年題乃行王道而王  
及試果然亦得第及殿試再夢神曰汝名在第五甲

吾換作第一卷後唱名果奪魁天下及囑使君詢旬  
陰德旬乃出三慳囊示之第一囊有三十九文當三  
錢第二囊有四千餘文折二錢第三囊有萬數小錢  
乃旬詳讞罪囚有從死罪正爲流罪者卽投一折二  
錢有從杖罪而決放者卽投一小錢又每效周虓行  
太上感應篇十種利益故獲斯報

陳天福茶陵人歲凶發廩平糶貧不能糶則與米無米  
則與飯又無飯與錢鄉里甚德之一日有一道人以  
銅錢一百二十爲糶米一斗天福云道人要齋糧當  
納上一斗何必用錢道人受米出門遂題四句於壁

間云遠近皆稱陳長者典錢糴米來施捨他時桂子  
與蘭孫平步玉堂與金馬陳後富又起賑濟倉平糶  
濟人生三子長季忍次季雲三季芳父子皆請鄉漕  
季芳名蘭孫補入國學後登第官登太常丞賑貧之  
報厥有明徵如此

大梵天王太子語父母曰金銀琉璃水精磈磈礫礫明  
珠寧可藏乎况一切財業非是真實水火盜賊公家  
惡子五家有分耳可濟貧乏予愛五家有分之言甚  
達而暢爰著而存之

人可昧心不容昧心可昧理不容昧嘗見世人生平所

作不善之事至死率現真性能自道其事或因惡疾  
以示戒或道所見兇惡之相及平時隱匿之事皆真  
性所自見禪家所謂藏於八識之底者是也嘗見一  
老嫗匿其主母之物徑三日忽患熱症呼其子謂曰  
我因盜物有人擊我物在石榴樹下計若干其子於  
石榴樹下果得物如其數送還其主少時嫗病已瘥  
人之處世善惡由心善事如江海潮波來無形影去無  
根源惡有速報如天地產物是處皆應可不慎之聊  
記近事一僧人以印經至南都頗攜重貲偶贖水雞  
放生爲漁者所窺引之曠地從後一擊而斃漁者以

其貲十之一首於官云自道中拾得官遂給之去既而其僧徒繼至蹤跡之傳言有一屍環蹲水雞晝夜叫號或其人也訪之良是聞於官官曰必前日首銀者也擒之不假訊而服遂抵罪夫漁之盜貲得自游僧自謂人莫予覲矣孰知水雞無知之物迺復爲之雪寃其必有宰是者矣噫善惡之速報也如是

唐李登者年十八爲鄉貢首自後凡十年一薦名愈下年幾五十不第一日齋沐詣葉靜法師具告乞入冥爲勘當此生如何法師上章梓潼祠伏謁見梓潼命吏示籍曰李登初生時賜玉印十八歲魁鄉薦十九

作狀元三十三位至右相緣得舉後窺鄰女張燕娘  
事雖不諧而繫其父張燈於獄以此罪展十年降第  
二甲二十八歲得舉後侵兄李豐屋基而奪之至形  
於訟以此又展十年降第三甲三十八歲得舉後長  
安邸中淫一良人婦鄭氏而成其夫白元之罪又展  
十年降第四甲四十八歲得舉後盜鄰居王驥家室  
女慶娘爲惡不悛已削去籍矣終身不第法師辭退  
以是語登登無以對一夕愧恨而死後之士人可以  
戒矣

龜城祝期者生有口才而習下人有生相不真者譏笑

之妍美者亦疵毀之愚昧者輕侮之智慧者亦評品之貧者鄙薄之富者亦訕謗之官僚則播其陰私士友則發其隱曲至於門地才具出已之右無可議論者則曰乃祖微人也乃父鄙人也或曰其母家工商也其妻家駟僮也或曰其弟不良其子不肖也凡所知識皆不逃於貶刺之中此猶細故也人小有過惡則既播揚之又增飾之以無爲有以一爲十以疑似爲端的以偶然爲故犯以不得已爲優爲以錯誤爲情實至於面折衆辱之又從而告訐之非徒待他人如此也雖已之族黨亦不免焉目其父母爲頑嚚自

其兄弟爲管蔡非止於身爲之也或教人興訟已則解釋之或教人詛罵已則辨證之所習旣久不知其非中年得舌簧之疾大約歲疾五七作每作出血一二升後以手探舌出以爪犁之涎血淋漓如屠狗彘觀者千百自宣其過曰人之口業不可作也舌枯不食而死噫作是業則有是報人慎無滋口業哉

閩中國計使薛文傑常與內樞密吳英有隙一日閩主鱗使巫徐彥視鬼宮中文傑因令以英將反爲對鱗信而殺英時英乂典閩兵軍士悅附聞英冤死無不切齒適吳人攻建州鱗發兵救之軍旣發乃逗遛不

進必欲得文傑而後行鑄不得已以檻車械送軍士  
得之嚮食立盡初文傑造檻車自出新意車中周植  
鐵鉉內向令囚不得轉動動則爲鉉所刺至是身自  
嘗之

李若水爲淮南司理時有劫賊五人事敗繫獄且言曾  
與僧人自成爲黨旣而五人已就戮而僧方追出僧  
言實未嘗爲盜若水於此從輕可矣而乃堅執賊語  
爲實夜以濕紙糊僧口鼻壓以土囊須臾臍腹皆裂  
而卒月餘獄吏李能無故大叫曰和尚不干我事特  
司理驅使耳言訖而卒明日推司劉元亦暴卒又明

日若水亦苦小腹絞痛號呼而卒又明日知軍孫誥判官趙禹亦皆暴卒未幾若水一門死喪殆盡無復遺類嗚呼若水受禍不亦甚酷矣哉聞之先輩云居官不可輕殺道流於此事益信

訟獄多寃最宜加恤余誦張佛子傳云張佛子名慶之嘗司獄以矜慎自持好潔獄一應囚具必親沐至暑月尤數每戒其徒曰人之麗於法豈得已哉我輩以司獄爲職若不加恤則罪者何所赴愬耶飲食湯藥臥具必加精潔慶故無子妻四十九歲病而甦夢神告以陰德之故始育子亨補三班借職孫有六男子

三同發黃裳榜二預薦開封長孫之二子亦同登霍  
端友榜云信乎天之施報善人如影響哉

昔盧嬰氣質文貌皆是過人人與之交必遭橫禍時元  
伯和爲軍司馬聞而不信召與之飲宴未終而節度  
陳少游已遣軍吏縛伯和而去矣或以告少游少游  
亦不信曰伯和自當有罪嬰何預焉吾將薦而官之  
及至潼關則上已幸奉天矣又有劉甲者亦如嬰之  
爲人人與之交必及於禍士子王建獨謂不然但人  
偶有災耳甲何預焉甲聞之大喜急往謝之相與談  
論久之乃退未幾建遂失火人因目爲鴟鵂或遇諸

塗無不急走遠避此非由先世夙因何以致然

予觀諸書載虎俵一節因思虎既有俵何人獨無爲憶  
一事記此有人善爲盜率以四更初往五更中歸以  
爲常不爽時刻其妻問之曰每旦時有鬼喚我同去  
去正與夥會因爲盜而歸其人卒爲邏者所擒下獄  
死焉知虎之俵不爲盜之鬼盜之鬼不爲虎之俵耶  
且聞自縊投河身死諸鬼率以時日覓人代替然後  
得脫化然則盜之鬼焉知不爲求代替之魂而求代  
替之魂焉知不輔生人之爲盜者耶是故人當念念  
以正善念起則善類輔之惡念起則惡類從之善類

多則福應惡類多則禍徵

燭遇暗則成破暗之功舟得水則成載物之功大抵水到渠成功當自立抑下而取功則有意存乎其間功未必立而禍先之矣王咨爲四川都轉運使摧井盡令井戶承認大額合認五十斤者必令倍認百斤井戶皆至破敗咨亦暴卒

陳元植初有家道好行陰騭禽獸亦蒙其惠每將食於高原之上百鳥逢見必飛鳴前後或來逼其坐隅元植甚憫之禽獸亦不畏懼一夕夢有綠衣人長三尺餘巾帶備具以一物與元植且謂之曰爾有陰德及

物爾壽命短促以此物延爾壽覺後飲食加增於常年九十九歲一旦袖有一物投地化爲緋衣人拱立於前曰君壽不逾四十爲有陰功是以延爾壽今須歸常理倏然不見元植與子孫訣別而終世傳放生可以延壽此亦可驗云

行仁者生種陰德者生好生者生濟人於難者生暴戾者亡好賄者亡尚勇者亡好勝人者亡故于公之治獄盛吉之平恕竇家之五桂王氏之三槐其所行有生道焉故澤及子孫享福綿遠由此言之則雖庭樹不來白鵲之乳王祐不手三槐之植亦自可必也始

皇之二世項氏之烏江鄧通之銅山董卓之郿塢其所行有死道焉故身及於難禍及子孫由此言之則雖山鬼不呼祖龍之死許負不相騰蛇之入亦未可保也嗚呼惡已之亡其亦惡人之亡好已之生其尚好人之生也哉

上帝好生惡殺凡殪生而殘命者皆天之所惡皆謂之逆天今人往往輕於殺牲如牛羊犬豕雞豚之屬視以爲應殺又取諸原禽野獸海錯山膠登於鼎俎極諸異味不知殘害物命雖食普他人而咎歸一已觀蘇子魂飛湯火命如雞之語殊可憫也且聞諸縉紳

云光祿日充內膳者惟羊豕鷄雞他無異品今羊豕  
可市而得所少者惟雞鷄而已若日宰充食殊爲踰  
分與玉食等故雞鷄無故雖不頻殺可也

莊子曰萬物與我爲一故禽獸之智有自然與人同者  
太古神聖之人其於異類會聚而訓受之謂其心智  
與人不殊遠也後世徒以小大智力相制造相食啖  
如以人之食肉謂爲人而生物則螽蚋之嗜膚虎狼  
之食人亦爲物而生人矣田氏食客千人曾不如鮑  
氏之弱子爲有知也雖然豈特食客千人卽千古以  
來能知萬物與我爲一而不忍食者幾何人哉

蜀社章生於富貴凡烹割之事皆躬視之後家道陵替  
無以爲生爲人屠劊以就口食又以飲啖兼人饕餮  
成疾性嗜肉味日嘗不足及以畧取魚以弋彈雀所  
見飛走皆萌殺心中年生五子皆無指口累所迫不  
足度日恓惶無聊尋有癩疾肌膚破裂膿血流漬見  
者掩鼻噫天道好生惡殺而斯人以殺爲心其受報  
也固宜

昔寶文王敏仲七世不殺又好放生至敏仲身乃自生  
疑一日咨決於小法華曰以某所見不殺不放一切  
付之無心可乎師厲聲曰公大錯公大錯豈作空解

耶面前露柱亦自無生著幾箇露柱能救得世間一箇苦惱衆生敏仲再發心放一百萬命其後持節淮甸

妖祥之象禍福由人人之平生不論貴賤婚嫁筵宴寧免烹割積日累歲或命逢惡曜身犯災危則當謝罪禳愆豈宜再傷物命今人有病患更多烹割以充祈禳是益其過也倘人以人而賤畜則天以天而賤人矣暴殄天物祭之誰享皇天無私唯德是輔能返躬則慶有餘矣嘗聞讓法論云鬼神得佛經聖號則脫血食幽冥鬼趣未能免俗者請事斯語

牛大畜也生則引犁以耕引車以載及其入屠肆也皮  
角骨肉皆盡於用而穀入太倉駕稅長途不言功焉  
傷哉劉禹錫嘆曰所求盡矣所利趨矣員能霸吳屬  
鏤斯賜斯旣帝秦五刑乃具長平威震杜郵已死陔  
下敵擒鍾室就誅用盡身殘功成禍歸然哉予悲牛  
之不得與駑馬齊驅黔驢同鳴也因著於此以附遠  
庖廚之義焉

衆生皆有知惟蛇爲最又性毒害有仇報之思焉嘗聞  
廣中有一儒生挾弓弩出郊外見赤蛇弩之矢貫其  
腹旣歸蛇尾其後有人報生生急走書室中避之蛇

飛穿牕而入爲矢所挂而免又有一商客他所見蛇  
斷其尾客去三年復來蛇入客臥內環帳外尋孔而  
入止有帳頂一孔蛇入首而尾不得入爲尾斷而結  
痂成骨朶也不然彼二生者幾不免矣俗云殺蛇不  
死留害又云殺蛇須火其骨否則骨刺肉亦能傷人  
慎之然何如不殺之尤善也

勸善書云宋京師一酒匠每見酒內蠅輒取出用乾灰  
救之如是數年所活甚多一日被罪當死府官執筆  
書判一蠅抱筆頭不得書逐之復來官疑有寃再閱  
出之董昭之救蟻江上後繫獄蟻領群蟻穴獄垣董

遂得由穴而出夫人苟專發一善念專行一善事至於久久不衰則其福應未有不確然者

古之好殺人者未有不反中其身及其子孫者也白起之殺降吳起之殺妻孫臏之殺姬是也非獨爲將也李斯之督責父子同戮商鞅之嚴刑車裂以徇周興之慘毒卒流嶺表李廣殺降身雖僅不封侯而至陵遂亡其宗寇忠愍之貶丁謂當國欲貶崖州已乃擬雷州丁之貶馮相乃擬崖州卒殞其驅亦可畏矣曹彬爲將一不妄殺以祿位終郭子儀再造唐室未嘗妄殺終享壽考厚福莫與倫比噫天報不爽特著其

略以示鑒戒云爾

附輪迴

形識相禪理固難明今著佛氏之說之近理者宗鏡錄云云何識離於身便速受身識捨故身新身未受當爾之時識作何相佛言如有丈夫著堅甲冑馬疾如風乘以入陣干戈旣交心亂墜馬武藝勁捷還卽跳上識棄於身速卽受身棄一受一亦復如是又復譬如人影現於水中無質可取手足而日及諸形狀與人不異體質事業影中皆無無冷無熱及與諸觸亦無肉段及與言音識棄故身未受新身相亦如是

寶積經云彼識欲移猶如睡人夢見諸事然此識不從  
咽喉及諸孔出其識亦復如是不求諸孔復問諸卵  
不破其識云何移徙佛言譬如以瞻婆花薰麻善熟  
然後壓油而言此是瞻婆花油然彼花香不從麻邊  
求孔而入因彼花麻二和合故其香從徙此識移卵  
亦復如是復問此識移徙善不善業其事云何佛言  
猶如種子擲置地內生芽莖葉乃至花菓或色赤白  
或性剛柔皆業力成熟故

又云賢護童真問物識捨此身隨善惡業遷受餘報其  
事云何佛答譬如風大出深山谷入蒼筤林其風便

香經於糞穢其風便臭若風香臭俱至則風香臭俱  
兼盛者先顯風大無形香臭無質然風持香臭遷之  
於遠此識捨身持善惡業遷受餘報亦復如是

寶積經云此識從衆生身內移於彼處有取有受而住  
或受福或受罪從於此世移於彼世猶如蜜蜂取諸  
花味而捨其花更移別花或捨惡花移至好花坐花  
上已樂著彼花取彼香味然此神識以多善根或受  
天身受天身已以惡果故復受地獄畜生餓鬼輪迴  
不已予謂輪迴果報之說略具此數段究之可以懸

解

輪迴之說歷考載籍似可考信如羊祜之識金環文澹之取香囊永師後身爲房琯張衡後身爲蔡邕之類人之生死殆不可一律論有入輪迴者有不入輪迴者有爲鬼不託生者有卽託生不爲鬼者有復爲神明者有化爲異物者有受福報者有受業報者有少作罪過而陰律却重者有少造福緣而陰功特厚者萬有不齊陰陽爲炭造化爲鑪豈可以常理測知哉榮進之子兆於有生之初歷歷可記劉靜修先生之生父夢神人馬載一兒至其家曰善養之旣覺而生乃名爲駒字夢驥黃縉晉卿之生母夫人夢大星煜煜

然墜於懷後緡以文章大鳴一世 國朝胡忠安公  
澹常州武進人生之夕夢持三花者以一遺之覺而  
生公累官禮部尚書蔚爲一代名臣夏忠靖公元吉  
湖廣湘陰人其母將誕之夕夢數人舁一巨狼來家  
遂悟俄而生公累官太保戶部尚書人謂奎木狼神  
宿之下降云王文安公字子充浙之義烏人大父前  
夕夢五色芝產門楣翼日公生識者以爲文章之兆  
其餘以先兆而下生人世者不可勝數也故曰其來  
也有自其出也有爲

盧媚兒者歐陽文忠公婢也姿貌端秀口中常作蓮花

香散越滿座人皆奇之但莫測其由公知潁州人有一僧自蜀中來頗能知人前生事公因語之僧云此女前身嘗爲尼誦法華經三十年一念之誤遂至於此公未之信後見婢問曰曾讀法華經否婢曰某失身於此所不暇也公命取是經示之一覽輒誦如素熟者易以他經則不能也然則前生之記誦後世猶易習熟修種之說豈虛語哉

凡四十八章

原養生之教

聖人以天地爲法象明人身之安危天地之氣一歲十

二卦一卦六爻共七十二爻半陰半陽總候三百六十日陰消陽長暑往寒來故十一月復卦坤下陽生井泉卽溫至於正月三陽陽氣平地故云內陽而外陰及乎四月六陽將盡陰氣下生則井底寒泉至於七月三陰平地故曰外陰而內陽也天地之氣相去八萬四千里日月週天動經一歲人於天地具體而微心腎之氣相去僅八寸四分元氣週流止於百刻故以子爲一陽生午爲一陰生七十二爻半陰半陽盈虛消息比之天地之氣特倏忽耳善攝生者吾之天地陰陽無愆則榮衛週密而六淫無自入矣

夫人應世之術非必盡廢諸事而後謂之攝養也特消  
息否泰而行之藏之量其才能而負之荷之若才不  
逮而強思力不勝而強舉深憂重患悲哀憔悴喜樂  
過度汲汲所欲戚戚所患談笑不節興寢失時挽弓  
引弩沉醉嘔吐飽食卽臥跳走喘乏懽呼哭泣皆爲  
過傷此古人所戒之節也况風前月下竹徑花邊俯  
仰傷懷杯餘疎散或進退惟谷而干祿或衝煙冒瘴  
以求榮呼吸雜邪停留寵辱飲食異味荏苒暴患尤  
不可不知戒焉

外護其身如惜干霄之茂樹勿縱一斧之刃伐傷內護

其行如惜渡海浮囊勿容一鍼之鋒穿破妙道之士  
當知二護之法有味哉其言之也君子修身慎行必  
須常存此意始得

善理家者忘其身善理國者忘其家何也爲富不仁則  
忘其身矣爲天下不顧家則忘其家矣聖人以肢體  
爲國以精氣爲民治其身而家無不齊治其家而國  
無不理

因馬念車因車念蓋趑趑躓躓而未決寤寐驚悸而不  
安夫二五之精妙合而凝兩腎中間白膜之內一點  
動氣大如筋頭鼓舞變化開闔週身薰蒸三焦消化

水穀外禦六淫內當萬慮晝夜無停八面受敵由是神隨物化氣逐神消榮衛告衰七竅反常矣噫業識茫茫安有止極是在人知足知止耳

人之始生其氣日向上升故齒毀復出髮剃更生志慮聰明日長及真精既溢之後其氣日漸下降初則便溺處毫毛次則兩脇下毫毛精神已虧於體矣又次則兩頰生髭髯又次則兩頷生髭髯而精神已虧於首矣然猶有精血充滿髭髯毫毛尚黑迨至中年則精血不能充滿而頤頰皓素霜雪滿顛齒落不生髮落不出矣君子見其徵則知其內驗其符則省其中

而頤體養精惜氣存神雖若逐亡猶恐不及况縱欲以戕生損身以促命乎

人之胚胎賴父母精血凝結而成及至十月胎完則父母精血一點也用不著止做得一箇胞胎其中得父母一點神氣日漸長大其精血惡濁之物日逐翻出至十月滿足翻天覆地因地一聲脫胎出世其父母惡濁之氣還不能盡又去口血剝胎髮每月變蒸輪年疹痘至七八歲又毀齒更生然後體氣漸清知慮漸長別立乾坤自成造化漸至十五六歲再爲父母矣豈非天地一團至真之氣所成乎人不自愛惜淪

於天札不能延年立命寔爲可惜

人之有身乃天地一點真陽之炁也是氣也生於無形  
無象之先聚於無極太極之內父母未生二五之精  
妙合而凝未有此身卽有此氣此氣運行周流六虛  
形以之而成心以之而靈耳目以之而聰明元神以  
之而運行五行以之而化生散之則混融無間聚之  
則凝結成形聖人知此攝動心止欲念聚神光結正  
氣天下泰然將正而定矣

受天下之群實心莫若虛應天下之群動心莫若靜惟  
虛不爲物之所礙惟靜不爲物之所惑故必窒慾以

空其性懲忿以虛其心以之修身則無自不得以之  
治性則無往不可寂然太定與道爲一

天地之氣不升則不降不出則不入虛管漑滿捻上懸  
之水固不泄爲無升氣而不能降也空瓶小口頓漑  
不入爲氣不出而不能入也善養生者能存其神則  
氣自裕神之所至氣亦隨之而住焉盈天地間皆氣  
也氣不爲天地之所盜則爲吾人之所盜長生久視  
之術其要在此人顧損精以耗其氣何哉

墳素之書以心爲身中君主之官神明出焉以此養生  
則壽沒齒不殆主不明則道閉塞而不通形乃大傷

以此養生則殃聖人以身爲國以心爲君以精氣爲  
民抱一守中心不妄用故精充氣住戰退百邪丹田  
有寶四大輕安修之不已內功外行乃證真仙

長生之道莊子一段亦自好看如云黃帝問廣成子治  
身柰何而可以長久廣成子曰善哉問至道之精窈  
窈冥冥至道之極昏昏默默無視無聽抱神以靜形  
將自正必靜必清無勞爾形無搖爾精乃可長生慎  
內閉外多知爲敗我守其一以處其和故千二百歲  
而形未嘗衰人果能無勞爾形無搖爾精長生之道  
可以無俟外覓

金來歸性初乃得稱還丹朱子以爲叅同吐露還丹要訣在此恰不知無者以奉上上有神德居此兩孔竅法金炁亦相胥等語亦是此意俱恐人以形相求之故交互其辭金不對木却以對性無不對有却以對上神以對德不以道對金以對炁不以木對恐人泥性情金木上下神炁道德而求要之只是鉛汞二字鉛不下沉汞不上飛只是交結在吾儒之道只是懲忿窒慾鉛汞自結也

形以道全命以術延此二語道盡金丹骨髓以道全者只是修性工夫以術延者只是修命工夫仙歌云若

還修性不修命總是神仙第一病若還修命不修丹  
萬劫英靈難入聖如此則修性修命修丹工夫俱不  
可少修性之法與二乘坐禪頗同修命之法只是頃  
刻結丹之妙修丹之法則有天元地元人元之分然  
總不過是收拾身心斂藏神氣二語耳道雖分三理  
只致一

古詩云超凡一句絕商量說破教君笑斷腸一切順違  
生死事莫令厭戀作心王大抵桑榆之景勞逸不同  
勞心者甚於勞力善爲心王者勞亦如是逸亦如是  
如魚飲水冷暖自知弗以有涯之身供彼無涯之事

物生於天而養於天然人爲嗜欲所勝聲色之蠱勢利  
之徇燠寒之觸情炎於中形索於外天始不能司其  
養矣聖人作內經數萬言或防於未然或捄於已然  
無非補天養也嗚呼知養生之在我則知聖人之言  
之當鑒如迷慾不返則天且不能如之何況古人之  
陳言乎

血肉之軀未嘗無病鳥獸亦血肉也巢居穴處飽而後  
已何以無病馬牛鷹鷄亦鳥獸也乃亦有病何也以  
鳥獸未嘗受人羈勒而馬牛鷹鷄則轡繫在人故耳  
夫人勞心勞力爲治人事人之所役使安得不爲諸

疾之所侵覩君子見其始卽知其終善爲心王不爲形役病安從生

飲食有節脾土不泄調息寡言肺金自全恬然無欲腎水自足動靜宜敬心火自定寵辱不驚肝木以寧此得之楊景明先生之傳云養生家日用之不可廢者余謂豈獨養生卽躋賢聖亦不過是語矣

身有毛髮處俱是精之走漏處頭之有髮精隨上越也眼之有毛精隨視出也鼻之有毫精隨氣行也頤頰之有髭鬚精隨口發也便溺之有毫毛精隨液動也蓋精發於竅氣亦從之其不及隨竅出者橫溢於旁

遂爲毛髮耳此最爲一身精神之徵皓素枯槁而不之惜何哉

身中六賊惟眼最緊身中隄防六賊亦惟眼爲最難故目中一見可欲則心君爲之奔逸馳驟不可復制善隄防者就於此處著力似有根柢陰符經云機在目吾儒序克復首曰非禮勿視心經序眼耳鼻舌身意亦惟以眼爲先蓋三教聖人俱以此爲至要

註列子者曰色盛者驕力盛者奮是少壯之時也少壯則血氣飄溢欲慮充起安可以語道至於斑白則血氣旣衰欲慮柔而體將休矣故可與語道而行之也

然有循大化而不與化俱者常不失赤子之心雖壯而不驕雖老而不耗其於語道無往而不暇矣今之君子功成名遂霜雪盈顛而方且不暇聞道焉抑又何哉

眼者神之牖鼻者氣之戶尾閭者精之路人多視則神耗多息則氣虛頻好內則精竭務須時時閉目以養神日逐調息以養氣緊閉下元以養精精充則氣裕氣裕則神完道家謂之三寶又謂之大藥此非惑於異端之教寔吾儒養生之常理耳

精存於目則其視明精存於耳則其聽聰精留於口則

其言當精集於心則其慮通故閉四關則終身無患  
又曰中欲不出謂之扃外邪不入謂之閉中扃外閉  
何事不節外閉中扃何事不成合文子之三語觀之  
人何可不愛精而遠欲耶

孔子曰及其壯也血氣方剛戒之在鬪夫鬪者非特鬪  
狠纔有勝心卽自傷和學未明而傲養未成而驕志  
不行則鬱而病矣自暴自棄言不及義而狂矣大抵  
血氣盛旺之時難以制抑凡事當先知心是吾之靈  
明主人一切好欲欺侮凌奪肆恣者是血氣所使倘  
犯刑名災害則是靈明主人自受苦辱也嘗作此想

者自然漸成調伏

男子八歲而陽精生十六歲而陽精泄八八六十四而陽精竭女子七歲而癸水生十四歲而癸水降七七四十九而癸水竭予嘗驗之男子之壽多阻於六十四歲之外稍有不謹多生腫脹風痺諸疾多損壽元故曰人生七十古來稀女子之壽多阻於四十九歲之外稍有不謹則多生崩淋中脫諸疾亦多損壽元男子能過六十八九女子能過五十三四則可躋上壽無難故知命者於此耗竭之時尤宜加謹此真人鬼關揆也

人大怒破陰大喜墜陽薄氣發暗驚怖爲狂憂悲焦心  
疾乃成積人能除此五者卽合於神明五臟寧思慮  
平耳目聰明筋骨勁強疎達而不悖堅強而不匱  
人生類以眠卧爲晏息飲食爲頤養不知睡卧最不可  
嗜禪家以爲六慾之首嗜卧則損神氣飲食亦不可  
過多飲食多最能抑塞陽氣不能上升將以養生實  
以殘生也君子夙興夜寐常使清明在躬淡餐少食  
常使腸胃清虛則神氣周流陰陽得位此最養生之  
大要若肆志網縛恣啖濃鮮殊非調護之宜矣

張南軒攝生四要云少思以養神少慾以養精少勞以

養力少言以養氣竊謂此四少人不能久持耳若久  
乂行之則精氣神自充雖不煉養而煉養在其中若  
自少而至無至於無思無慾無勞無言此又向上一  
著久久不已可證天仙天何思何慾何勞何言

九華真妃曰眼者身之鏡耳者體之牖視多則鏡昏聽  
衆則牖閉面者神之庭髮者腦之華心悲則面焦腦  
減則髮素精者體之神明者身之寶勞多則精散營  
竟則明消彼其所言磨鏡之石決牖之術童面之經  
還白之法益精之道不過是寶精裕氣耳故曰上品  
上藥神與氣精

邢和叔言吾曹常須愛養精力精力稍不足則勸所臨  
事皆勉強而無誠意接賓客言語尚可見况臨大事  
乎大抵能慎保始終者卻疾延年老當益壯雖有貧  
富之異而榮衛冲融四時若春比之抱病而富且貴  
已爲霄壤之隔矣况能進進不已則非常人所可知  
也

青州錄事參軍麻希憲年九十餘致仕唐太宗問攝生  
術對曰臣無他術惟是少情寡慾節聲色薄滋味而  
已唐柳公慶年八十有強力人問其術對曰平生未  
嘗以脾胃熟生物暖冷物以元氣佐喜怒宋呂許公

爲相問服食之法於任恭惠公公曰不曉養生之術  
但中年因讀文選有悟耳謂石蘊玉而山輝水含珠  
而川媚許公深以爲然觀此三說則養生之道可以  
懸解若夫煉服食以冀長生此則方士之妄談高朗  
之士慎弗惑焉

唐同州刺史孟詵致仕歸伊陽年雖晚暮志力如壯嘗  
謂所親曰若能保身養性者常須善言莫離口良藥  
莫離手竊謂善言不離口則德崇而德厚良藥不離  
手則病去而身康固長久之術也然口有善言又當  
身行善事物療身病又當法療心病不尤爲愈哉

國朝道林蔣先生偶抱羸疾歲乙亥病益甚噓血幾不起先生乃謝醫藥借寓道林寺一室祇以一力自隨閉目趺足默坐澄心常達晝夜不就枕席一日忽香津滿頰一片虛白炯炯見前冷然有省之間而沉痾已溘然去體矣先生嘗曰某讀關洛諸書見得萬物一體未敢自信直到三十二三歲因病去寺中靜坐將怕死與戀老母念頭一齊斷却如此者半年餘一旦忽覺此心洞然宇宙渾屬一身呼吸痛癢全無間隔

宋鼂文元公名迥字明遠天資純至年過四十登第始

娶得煉氣服形之法謝事燕居獨處道院不治他務  
戒家人無輒有請惟二膳以時而進旣畢卽徹若祭  
享然其言曰辯不如訥語不如默動不如靜忙不如  
閒又云清勝於濁靜勝於動忘勝於思嘿勝於語性  
勝於情五勝習熟乃入道之漸門也晚年耳中聞聲  
自言如樂中簧以爲學道靈應之驗享年八十四而  
卒

宣和中一兵偶爲車轢蹙不能行遇一道人傳以少藥  
步履如初兵大感激徧遊天下訪求其人少致謝悃  
一日復遇諸途哭泣拜謝道人曰吾施恩於人多矣

誰如子者授以祕訣兵遂得道文中聞之詣兵問道  
兵曰清靜是道簡易爲上文中頓若有省噫知清靜  
之爲道與簡易之爲道何俟他求

王邦叔侍紫陽爲弟子凡九年因至羅浮語及丹訣紫  
陽曰自太極旣分之後一點靈光人人有分賢不加  
多愚不加少盍去靜室中思我此語有所覺卽急來  
邦叔靜思至夜紫陽詣其室扣門邦叔趨而出迎紫  
陽笑曰吾一尋汝便見爾兩日尋他不得遂滅所執  
之燭而退邦叔大窘坐至五更大悟通體汗流待旦  
以頌呈紫陽月照長江風浪息魚龍遁迹水天平箇

中誰唱真仙子聲滿虛空萬籟清紫陽問曰誰唱誰  
聽邦叔遂荅一詩莫問誰莫問誰一聲高了一聲低  
阿誰唱阿誰聽橫豎大千說不盡先生有意度迷徒  
急撞靈臺安寶鏡鏡明澄靜萬緣空百萬絲條處處  
通斗轉星移人睡定覺來紅日正當中紫陽遂出金  
丹圖傳之邦叔止羅浮三十年坐化

附胎育

男三十而娶女二十而嫁古之制也今人以病男羸女  
爲不了而畢姻或男女病患新瘥以吉日之迫而結  
婚病蛾無能繭之蠶破藥無結實之菓少年子女三

關情逸五神志蕩房中分外業種成胎或侏儒不振  
或巨首瞠目雖具人形實無聰慧其次學道行姪執  
法無戒咤鬼驅神產男生女望之不似余實見之每  
為憐憫

受娠之後始終無犯則胎氣真純忽有靈光入夢或有  
瑞氣相憑而生聖賢君子是以古今史傳分明五祖  
山誠禪師慕蘇老泉而為東坡學士武夷丹士投真  
漆匠之家而產西山先生嵩道者受史衛王之供而  
出嵩之丞相凡投胎奪舍之靈常有神童茂異之士  
故胎教之法使孕婦常觀良金美玉瑚璉簠簋之器

山川名畫之祥又聽講誦經史傳集而使秀氣入胎  
欲其生而知之是乃仁術也投胎奪舍之說吾儒所  
無胎教之法自不可少

寶積經云是諸衆生託胎在母腹中三十七箇七日有  
二十九種業風所吹次第成就第一七日狀如酪漿  
第二七日狀如凝酪第三七日狀如藥杵第四七日  
狀如鞞援第五七日分頭臂脰第六七日肘膝相見  
第七七日手足掌現第八七日二十指現第九七日  
九孔方現第十七日聲音俱足第十一七日九孔開  
通第十二七日生腸節乳第十三七日生飢渴想第

十四七日生九萬筋第十五七日生八萬脉第十六  
七日通出入息第十七七日食道漸寬第十八第十  
九七日六根具足第二十七日徧生骨節第二十一  
二十二二十三七日生血肉皮第二十四二十五七  
日長血肉皮第二十六七日生髮毛爪第二十七七  
日分善惡相第二十八七日妄生八想第二十九三  
十七日黑白隨業第三十一至三十六七日身相具  
足第三十七七日念欲出生第三十八七日滿十箇  
月向母產門倒卓而生

法苑珠林云復有七事受胎一相觸二取衣三下精四

手摩五見色六聞聲七嗅香何謂相觸受胎如人月  
水去時喜樂男子若男子以身觸其身分卽生貪著  
而便懷胎何謂取衣受胎如優陀夷共婦出家愛欲  
不止各相發問欲精汗衣尼取舐之復取內根卽便  
懷胎何謂下精受胎如鹿母與道士精欲心而飲遂  
便懷胎何謂手摩受胎如睽菩薩父母俱盲出家爲  
道不合陰陽手摩臍下卽便懷胎何謂見色受胎有  
一女人月華水成不得男子合欲情盛唯視男子如  
宮女亦復如是卽便懷胎何謂聞聲受胎如白鷺鳥  
悉雌無雄春陽時節雷鳴初發一心聞聲卽便懷胎

何謂麝香受胎如秦母牛但麝犢氣卽便懷胎此七  
事考之傳記歷有可信故錄而存之

凡四十章

推筆集卷之四

推筆集卷之四

話

長洲吳曜書  
馬思等同刻

推蓬寤語卷之五

雲間李豫亨 元薦甫

本術篇

元薦氏曰道與術不相離也忘象而遡真術也幾於道矣迷理而執數道也幾於術矣淺劣泛覽九流濫塵六藝迄不能究其所極默而識之歲月滋久迺稍稍融貫其旨要皆本於聖人之創制固道之支流遺裔也可無務乎迺約諸家之要歸綜其所由立者羅網天下書逸文研味其本始昭晰

夫本末精粗之辨俾然有條歸於至道僭陳茲  
篇名曰本術

本堪輿之術

慎卜兆域非惟利及生人實欲安妥亡靈故其要在陰  
陽不偏若偏於陽則亡者化而爲飛偏於陰則亡者  
化而爲走况葬不得地又有樹穿白蟻之患生焉仁  
人孝子所不忍聞也今須擇稍稍風氣完固陰陽不  
太偏勝及無城郭道路諸患者爲之庶慰人子之心  
若倚祖父墳墓以求子孫之福利又非矣

死者生之機靜者動之根人惟死也其中有生氣存焉

以此乘地中生炁則亡靈安妥子孫受福理固有之  
此葬書所爲作也但地中之炁難於聚會非水則無  
以界有風則易以散故謂之風水非得道眼指示則  
雖穴在道旁亦不易識其妙在羅城周密四圍擁護  
奇秀森列巒頭雄偉苟能悟此思過半矣雖然遇者  
人也所以遇者天也君子尚修德以伺之

天地間大地生亦不數非術士心通造化妙合玄微亦  
不易識第一要知地何郡何邑鍾聚元氣當生異人  
第二要知時何元何甲子與地氣合此地當興第三  
要知人何家厚積祖德純純善慶將及知此三者又

能望地方之氣任推遷之運識地所在或近城市或  
居山谷識穴所在或饒左或饒右不差毫髮然後剋  
應可企若其家不應得地而強圖或力小而圖大焉  
術人受殃生人辭福噫此嘗試之言也余安敢以窺  
言而惑世哉

堪輿家書有云山肥人飽山瘦人飢山清人美山濁人  
媿山完人喜山破人悲山歸人聚山走人離山伸人  
壽山縮人低山明人達山暗人迷山向人順山背人  
欺又云以端方而知其忠以傾側而知其佞柔亂以  
知淫卑劣以知賊粗猛以知惡瘦薄以知貧粹美知

慈威武知斷分窮源大江而知出身之遠近觀外城  
內局而知器量之弘隘人之居止日挹山川之氣而  
受其秀人之墳墓子孫世代心之所嚮往其以類應  
理有不可誣者

地理深淺之說古語云北方土厚氣沉宜深南方土薄  
氣浮宜淺宜深者卽司馬陀頭所謂乳脉粗大陽藏  
於深必須深取壙以通之宜淺者卽朱子所謂興化  
漳泉間棺只浮於土上深者僅以一半入地上面封  
土甚高後見福州人專移舊墳稍深者無不有水以  
此觀之葬之深淺係於土之厚薄又不專拘拘凹突

之間也孝子順孫於此詳之酌地所宜而弗可惑於禍福之說

古書云前有滂池後有丘陵東有流水西有長道謂之正穴此何義蓋葬家最忌偏陰偏陽南有滂池則火不上炎北有丘陵則水不下沉此抑火而滋水也東有流水則移西金於東西有長道則移東木於西此益金而剋木也水火不偏金木得位故謂之正穴俗師不解其義凡見前有池湖卽指爲明堂而不知太闊則水濫後有丘阜指爲來龍而不知太峻則火炎此真癡人面前不可說夢

葬書云龍過千江不過一堂余嘗舉似術者云明堂雖闊不過一江耳何爲過千江而不過一堂也術者無以應余語之曰氣脉未止則雖千江可過若山川之氣至此凝止諸水於此會衆山於此合前有明堂後有玄武左右環抱此正結穴所在也一些氣脉漏洩不去故穴中融暖溫 and 胎息孕育名爲大地術者大服但大地所在自有鬼神司厥予奪非知力所能窺竊也

公位之說不過儉小之徒假此以歆動邪心而要私賄耳術莫神於楊氏矣其斷明堂之訣曰明堂要似蓮

葉水盪歸左位長公起盪歸右處小公興若  
在中心諸位貴卜氏亦以東宮竄過西宮右  
臂尖射左臂卜長小房之利害但其法不過  
以東爲長子西爲少子東西之中則爲中子  
以分其大槩而已若細分富貴於毫髮之間  
則拘泥而失其初矣竟亦不驗

語曰天下萬事俱順惟金丹地理爲逆然哉  
金丹之道曰還曰返地理之說曰聚曰止老  
氏曰天地之間其猶橐籥乎虛而不屈動而  
愈出故不返不還則散不聚不止則離氣之  
衰也物之順也生之所以死也能返能還則  
凝旣聚旣止則合氣之盛也物之逆也死

之所以生也故以之養生則精氣神混合爲一形神俱妙可以長生以之葬亡則峯巒丘阜四面環拱乘其生氣鬼福及人其術雖流於方伎然其始之作者大都能窺見天地玄妙故能以術收攝盜竊元神歸於一所有立竿見影之驗今之術者非古昔比也而假託古人以言禍福損益何與

玄機云一取勢二取形三折明堂四登龍虎五對朝山以爲最簡明而且切要知者以爲雜而未純正爲未了乘生氣一句耳蓋生氣者風水家之極論也后爲元氣前爲堂氣左右有界水者爲明氣無則爲暗氣

前親后倚四遮周密而穴中完固者爲盈氣前官後鬼龍虎二曜能使外豐滿而內員淨者爲餘氣主峯重厚端聳無破漏者爲積氣水之來而無原者爲開氣其生而無流者爲閒氣又山之發腦處爲生氣窮極處爲絕氣枝蔓處爲散氣欹斜處爲敗氣孤弱處爲絕氣故瓊林經曰得水則氣止無風則氣聚此葬法第一也知此生氣而又知聚之之法則吉氣在中矣

鄭彥淵論生氣曰生氣者卽一元運化之氣也在地則發生萬物無處無之無時不然也然非求氣於土中

也無者氣之本體蔡氏所謂氣無形者是也故秦人  
嘗謂東南有天子氣楚人亦謂望其氣成五采唐人  
亦謂奉天有天子氣本朝劉誠意遊西湖見異雲起  
西北光映水中同遊者皆以爲慶雲伯溫曰此天子  
氣也應在金陵此皆求氣於無形之妙凡此必須道  
眼非尋常目力所及今人卽須求之形勢達僧所謂  
形吉者氣亦吉形凶者氣亦凶形舒者氣亦舒形暴  
者氣亦暴形一者氣亦一形亂者氣亦亂嗚呼得之  
矣

觀瀾翁曰富貴之地天地所祕惜神物所護持苟非其

人見如不見劉氏曰人之貴賤本乎天命家之盛衰  
係乎氣數地有此穴則世有此人苟非其人則此穴  
將昧而不顯得而復失昔李唐龍圖蒞政酷虐楊公  
得數代宰執之地欲以與之夢二使叱之而止孫鍾  
孤孝種瓜爲業三仙人乞食畢示之葬地後四世爲  
吳帝觀此豈非陰德必報之驗蔡牧堂曰求地者必  
以積德爲本

朱子曰冀州風水山脉從雲中來自脊以西之水流於  
龍門西河以東之水流於海前面黃河環遶華山爲  
虎泰山爲龍嵩山爲前案淮南諸山爲第二重案江

南諸山及五嶺爲第三四重案又曰嚴州富陽縣江山之勝雄偉非常蓋富陽乃孫氏所起之處而嚴州乃高宗受命之邦也又曰堯都中原風水極佳左河東太行諸山相遶海島諸山亦相向右譚南直至泰山湊海二自蜀出湖南廬山諸嶺三自五嶺至閩越北則黑水之類纏繞至於南海又曰河東地形極好左右多山黃河遶之嵩山列其前又曰前代都關中者山自蜀漢而來至長安而盡黃河旋遶也又東南必都建康者諸方水道所繫武昌亦好形勢上通關陝中向許洛下通山東觀此數語每論一處風水便

及許多去處合成許大器局時師觀地亦必識得一郡一邑一村落山水自何處起至何處止然後可以原其起而乘其止也

地理之書謂可改天命而不知其卒爲天命所囿嘗觀圖地之家其昧者無論矣有得吉壤而不果葬者則怵於公位不及葬者則惑於年月不善葬者則誤於庸師不能葬者則阨於爭訟又有已葬而旋廢者則盡於異說而以禍福修短之時有者動之往往留畀福人此非天命哉故其書卒歸於陰德君子寧汲汲以修德無寧汲汲以求地德旣積地自至地旣至福

斯應焉

葬有夙緣不可強致昔衛靈公没卜葬於故墓不吉卜  
沙丘而吉掘之數仞得石槨焉洗而視之銘曰不馮  
其子靈公奪而里之藹有古壙其中記曰佳城鬱鬱  
三千年見白日吁嗟滕公居此室果爲滕公灌嬰所  
葬宋朱韋齋詩有杯酒閒談寂歷中之句及晦菴改  
葬韋齋乃在寂歷地名由此觀之葬有定數但人子  
送終不可不自盡其心耳

浮屠泓與張悅市宅戒無穿東北隅他日怪宅氣索然  
視隅有三坎各深丈餘驚曰公富貴一世而已諸子

將不終後竟如其言此旣穿坎而召禍乎抑將有子  
孫之禍而後穿坎也吾儀圖之張悅之宜無後已定  
于天矣穿陽適以符之耳果如僧言則張悅力能別  
卜一宅再擇宅氣王相者以爲居子孫之天命其可  
改乎萬無此理

賴布衣之徽州悞覆程丞相舊墓鄉人不信夜夢神人  
告曰汝衣祿在杭金嚴間此地不宜久住乃速行宿  
逆旅逆旅人識之令相地鑿一丈二尺深得穴傍有  
神祠爲之夜哭至今累世富貴不絕遂之杭金嚴間  
甚著聲今浙西富貴家祖墳大抵皆賴卜也由此而

觀則知術士衣食尚有定分況人生首丘豈無定所  
或求而不遇或遇而復失皆有天命存焉爲子孫者  
慎毋久暴露以來陰譴哉

古者天子得爲隧道傍穿隧道而攬棺于其中其他皆  
直下爲壙而懸棺以窆墓是塋域墳是封土隆起者  
古人墳極高大壙中容得人行興化漳泉間墳墓甚  
高棺只浮在地上深者僅有一半入地稍深者無不  
有水地土淺薄也北方地土深厚則深藏不妨孔防  
墓之封其崇四尺立小石碑於前亦高四尺跌高尺  
許孔子篆季札墓前石云嗚呼有吳延陵季子之墓

其墓誌則兩石字面相向埋之壙前慮異時陵谷變遷此石先見庶有人爲掩護耳

死者精神離去軀體自與生人別是一境界不自知死視昔形骸如芻狗耳焚之亦可沉之亦可瘞之亦可衣薪而棄諸溝壑亦可袞衣繡裳而納諸石槨亦可但非所以慰仁人孝子之心耳吾將譬之人方睡夢重裯疊褥不知也錦蓋繡帷不知也及其醒也彼方知之方其夢也彼不知也世顧殉死喪生芻靈明器凡筵車馬盛陳廣設誇耀閭里亦何益矣但倣古人稱家有無棺槨周身親膚遠土死者無虧生者不恨

豈不快哉

空谷傳聲氣之所鼓也嘗觀天台山瀑布泉若人作語則泉四散飛灑其面濕衣浣之不脫推原其故則由四面俱山石山中氣充滿氣動則泉飛耳世之堪輿家欲地氣聚者爲此也若四圍山水飛走氣則何有此當神悟心解故曰水底必須道眼徒以形似求者非造閭域者也

人云鍼能指南非也鍼乃頑鐵死物豈能辨方域能辨南北者磁石之氣耳術士藏鍼不離乎石正欲鍼傳磁氣耳試以未養之鍼而浮水則南北淆不惟不辨

南北鍼亦不浮矣予謂磁石乃陽物故氣亦從陽陽氣在南故鍼鋒亦從南鍼首向北者得氣獨重戀乎陰也姑誌此以俟明者焉

堪輿家之說有其物甚小而所關甚大者如江水衝徙浦子口城相傳歸咎於部使者之拆畫牆天津衛近少魚鮮相傳歸咎於水滸之石獅子雖未委真的然相傳有自或未可知以此觀之則丘墓之鎮石居室之壓獸未可輕廢也昔桑道茂居有二栢甚茂曰人居而木蕃者去之乃以鐵數十斤埋其下復曰後有發其地者死太和中溫造居之發藏鐵而造死蒲津

橋每冬冰未合春冰初解流澌崢嶸縴斷航破而人  
不得濟開元間乃授有司俾以鐵代竹結爲連鑲鎔  
鐵爲伏牛偶立於兩岸以繫繩且厭水物由是奔流  
不突而橋因可濟以是爲證厭勝之術豈可謂盡無  
哉君子慎慮而從之可焉

凡二十二章

本醫藥之術

形不足者補之以味精不足者補之以氣二語乃醫門  
要旨所謂補之以味如甘溫補脾鹹寒補腎之類人  
皆知之若補之以氣人多不解藥物有味有氣如氣

清則入首氣濁則入足氣陽則上升氣陰則下降氣香則竄入腠理氣重則滲入血脉之類是已雖然醫者天下之神術也必與藥品輕重深淺穠淡厚薄冥會默契然後投之所向無不如意若卽按方處治未有不誤者也

醫之用藥猶將之用兵熱之攻寒寒之攻熱此正治也因寒攻寒因熱攻熱此因治也子虛者補其母母虛者益其子培東耗西增水抑火或治標以救急或治本以湔緩譬如兵法聲東擊西奔左備右攻其所不守守其所不攻衝其虛避其實擊其惰遠其銳兵無

常勢醫無常形能因敵變化而取勝者謂之神將能  
因病變化而取效者謂之神醫

醫者意也其術不盡於藥石故古人有泥丸菴草可以  
濟人之語蘇耽橘井食葉飲泉卽愈豈專藥石也此  
在醫者有恒能真心濟世不逐逐聲利之間則雖祝  
由可以已病以我正氣却彼邪氣德行所積隨施隨  
驗固非常理可測若只專專計刀錐之利已心不正  
安能却邪雖已試之方珍異之藥或未必驗此蓋有  
神明助乎其間非可擯之爲妄語也

士大夫小小疾患不可輕用艾火鍼熨此一法雖古人

有之但士夫有疾不能靜養多接見賓客酬應世務  
心火不寧嗜欲多熾不能已病反致增疾止須倍加  
頤養不以外物縈心止聲色以清耳目戒淫佚以養  
性情苟非深痼之病未有不已者也

病有五一日稟受之病與生俱生者是也二曰果報之  
病伯牛之癩袁盎之瘡是也三曰六淫之病風寒暑  
濕燥火外邪所侵者是也四曰七情之病喜怒哀樂  
憂恐思者是也五曰金瘡癰撲外傷者是也外傷等  
證顯而易曉七情者責當在誰六淫則亦以此而召  
之耳果報之病前生今世所作亦莫非我若覺之早

釋冤解結庶幾全生其與生俱生之病抑亦父母之源流其可盡除務在以時消息之而已

後漢郭玉謂療貴人有四難自用意而不任醫一難也將身不謹二難也骨節安閒不能使藥三難也好逸惡勞四難也余以爲此四病貴人果有之然貴人之遇醫亦有四難遠地相召素不曾試一難也稍涉毒味不敢輕用二難也尊高臨之醫不能盡意三難也專任僕妾烹煮失宜四難也以此言之貴人不可輕於致病尤須慎於服藥如夫子所謂其未達不敢嘗焉然後可

醫家乘人之危古經比之殺人古經云不恤緩急妄索  
事分殺人也也不問有無必欲多得殺人也懶惰睡眠  
輕視人命殺人也辨察不明用藥差悞殺人也見不  
卽治俄至增劇殺入也有此五失挾術殺人甚於挺  
刃昔陳景仁妻張氏有微疾醫悞投血隔之藥遂至  
不起旣死魂神蕩越一日因景仁出郊遂合爲一恍  
惚如狂獨歌獨笑以終其身觀此臨人病患可不慎  
夫

火食之人未有一生無病者少壯之人病猶未覺年高  
之人病乘其所甚而現精神不能支而衰病及之矣

此其積非一日之故也每見年華既邁不任其病患之苦必欲決去以爲快不知病根有生一病之所現卽一臟之受損乃汲汲焉求以醫藥草木之末療治之不知臟腑已不如昔病患自不全祛况寒涼溫熱之味解表下裏之藥亂攻妄投真精愈耗何如養氣存神寶精病以漸除反有過於服餌之效知命之士味之

古今名醫惟東垣爲聖其處方治病藥品極多譬如韓信用兵多多益善他如張子和之汗吐下三法多宜於北近日朱丹溪補陰諸方多宜於南自有醫以來

名士不數數也近醫書充棟多被庸工剽掠前書妄著論辨類集諸方玉石竝載一遇病患盲不能辨宜用何藥何方人命至重非以供庸工之嘗試也嗟乎三代以還豈獨聖學不能復明卽如小道亦未有可觀者焉

人生病患乃得於父母稟受之初者其終當有何疾亦是定數家有一僕其母五旬餘患膈咽而終其僕五旬餘亦患膈咽而終如其母之疾其母受胎後二十年而有是病其子經五十年而後有是病則其母未病之先而其子之病源已受是氣於結胎之時矣豈

非一定之數乎今人得末疾而汲汲求療於草木之粗祈禱之末其亦不知受病之源者矣

草木滋味原與人身精神本非同類止是藉其寒溫甘苦性氣救偏補敝耳然又視其人物質稟乃可奏功假如牛馬有病氣質頑鈍止取藥滓雜煮啖之其病可療村夫野氓生平不曾服藥氣質粗蠢苟遇病患止須庸醫稍稍品劑其病亦已至城市中之人病已難瘥及貴室宦家氣稟旣已清淑藥品卒不易應雖用上醫處劑稱量分銖猶不易冀其全效也若稍遇沉痾臥榻之病則岌岌乎殆矣

人之脉氣不同不可一類而推長人脉長短人脉短瘦人脉露肥人脉深性褊急者脉弦浮性明快者脉流利凶狠者脉勁實慈祥者脉和緩不攝之人病輕脉重有養之士病重脉輕忠厚之脉往來調暢詭譎之脉乍浮乍沉其餘素稟暴變之不同又有不可盡舉者要在指外盈虛消息之耳

蜀人通真子註叔和脉經已行於世而其道未行遂歷湖漢江浙亦未有目之者及至淮之邵伯鎮旅於僧舍亦無聞於人又將轉而之他主僧聞之曰子若不設肆誰則知之市有寺屋吾給子具請試爲之旣而

醫道大行家產豐足一日主僧將化召其前來密語  
曰子前生在此鋪街鑿井今享此報更宜積德言訖  
而化

神農氏遍嘗百草盡知草木甘苦寒溫立法攻治百病  
後世醫家相沿爲衣食計承襲差誤殺人之害多於  
生人之功余見粗工不識身中升降之理腠理啓閉  
之度妄施鍼藥致失人命殊爲可惜士君子須知病  
前自防之戒兢兢調適苟罹小患必須顧神養氣靜  
心固精俟其自復可以萬全若輕用藥餌縱得小效  
所傷必多藥無補法不可輕信惟有汗吐下三法推

陳致新差爲得理尤須慎而用之

遠在千萬里之外可以數測近在一身之內不可以理  
推何以故天地之遠中國之外按曆象據圖藉可盡  
知若一身之中心肝脾肺腎之五臟膀胱小腸膽大  
腸三焦之五腑位置則可知矣若其中所以運行所  
以溉注以生吾人者今之醫流雖度量揣摩萬端終  
不知也昔列子稱工人偃師所造倡者歌舞合節千  
變萬化惟意所適皆傳會革木膠漆白黑丹青之所  
爲內則肝膽心肺脾腎腸胃外則筋骨支節皮毛齒  
髮無不畢具試廢其心則口不能言廢其肝則目不

能視廢其腎則足不能步若偃師者非知造化之所  
爲乎嗚呼惟如是然後知吾身中之所以運行而惜  
乎偃師之不再生也

名醫用硝黃冷水治痘瘡毒氣太過者不可見其用藥  
相背而惑之有一種毒痘證頭面遍身渾如朱砂始  
出卽成一片不分箇數悶亂煩躁大便解血日夜無  
度又見一種毒痘出至十二三日口鼻閉塞氣無出  
路耳眼亦然漸次口鼻清血黯水迸然而出此二者  
固爲死症如敢以硝黃下之則或可回生倘一疑慮  
則禍不旋踵矣余有慧女出痘患如前症頓至不救

至今惜之因見此論殊有理筆記之以惠來者

萬病解毒丹藥品具載方書余嘗見 藩府所製藥味

真正搆藏篋笥中每遇奇疾莫不應手而瘥嘗謂仕  
宦遇美藥如楮腰子三七血竭阿膠花藥石蚬膽諸  
品必謹藏之伺一用著處轉死回生一壺千金也閑  
門著方書雖非大臣盛業然知醫豈非人子之有事  
哉

養生主論云予嘗從士夫遊洛間每聞諸公稱一人善  
治背瘡者嘆其不遇其說神異忽日有一人同一方  
士來投予之別墅托宿數日云善治背瘡詢之卽其

人也問其方唯唯然自言某師遇仙得傳此草雖六月間以手探之亦如冰雪一日至墅外忽自咄咄而報曰門前幸有此仙草遂鄭重付祝於余余嘆而諾之曰此卽射干也方士曰某昔貨藥淮西適值官司拏醫出征遂竄入八百里山場內遇一老姥年一二百歲自謂金亡避兵來此元完顏氏醫姥也傳以此草并壽星散專治惡瘡救人無數并著其方地扁竹散射干爲末射干卽俗名地扁竹也原花園中之物葉如良薑根如竹鞭其色初開如金之狀右一味每用小錢抄末三字許溫酒調服病在上卽微吐在下

卽微瀉予用濟人其功如神仍用膏藥收口壽星散  
專治惡瘡痛不可當者糝之不痛不痛糝之卽知痛  
大南星一味爲末右一味如背瘡大痛者遍糝於上  
卽得安卧不知痛者糝之至於知痛卽可治也

瘍醫公孫知叔賦性慈慧記問詳博深明百藥之性味  
創造丹砂雄黃礬石磁石石膽爲五毒之劑其說蓋  
取丹砂養血而益心雄黃長肉而補脾礬石理脂膏  
而助肺磁石通骨液而壯腎石膽治筋而滋肝外療  
瘡瘍之五證內應五臟拘之以黃堊熟之以火候藥  
成傳瘍無不神效一人鬚有疽生一夕決潰勢甚危

殆以前藥傳之應手而瘥此方今醫書未知載否世亦罕用予謹識之以俟深知醫理者取焉

醫方之用有驗於一方而不驗於他方有效於一用而不效於再用有應於一人而不應於他人有行於一年而不行於他年爲南北異氣深淺異病貴賤異位司天異宜也善醫者明於天地之機陰陽之變尊卑之位臟腑之因其庶乎其得之矣雖然醫一也用於彼則驗用於我則不驗用於前則驗用於後則不驗何故由人之德行由人之福量救人之真誠與不真誠耳

凡二十章

本卜筮之術

枯草朽骨瓦礫金石無情之物豈足與計事所以能前  
知者以我之神合天地之神以我之炁合天地之氣  
耳然卜筮之傳言神祠之籤筮著龜籤筮不知也卜  
筮之人不知也吾人亦不知也天地鬼神以神告吾  
人以神遇未驗而晦旣驗而明彼此無容心焉爾矣  
若以私知揣摩億度其相去豈直千百而已哉故曰  
清明在躬志氣如神言至虛也

聖人之作易也廣大悉備用無遺理然天下之數實有

非易所能盡者世人卜筮率取諸易殊不知自易之外苟承之以無心秉之以真誠則無不可前知也天地之數無心則無私無私則公公則明明則先知真誠則不僞不僞則誠誠則感感則無不通雖觸物觀梅無不占驗何必易哉康節先生雖是易數然由渠胸次灑落靜裏乾坤閒中今古故能與天地日月合德合明能窺見天地分數嗚呼人能知相從林下二十年胸中豁然無一物者為何學然後能明天地之數

季札以樂卜趙孟以詩卜襄仲歸父以言卜子游子夏

以威儀卜沈尹氏以政卜孔成子以禮卜其應如響  
無他只是精誠之極而已苟能精誠則一心聽天胸  
中全是天理其心至虛至明無窒無礙鬼神從而應  
感矣非鬼神應之也吾心之天召之也心天朗然鬼  
神其依卜筮協從至誠之道可以前知

嚴君平卜筮成都與人子言依於孝與人臣言依於忠  
與人弟言依於順各因勢導之以善此以理喻人者  
也然不知數卽寓于理之中雖天地不能違理而爲  
數也人子能孝人臣能忠人弟能順雖不卜福應之  
矣子不能孝臣不能忠弟不能順雖卜禍應之矣昔

有一術士謁黃直卿云我亦有一箇大算數作善降  
祥作惡降殃惠迪吉從逆凶此理古今不差豈不優  
於卜數君子苟知嚴君平之卜又聞王直卿之言其  
見自別

靈源禪師館一日者能課使之課莫不奇中蘇朝奉者  
至寺使課無驗非特爲蘇凡爲達官貴人言皆無驗  
至爲市井凡庸山林之士課則如目覩而數計靈源  
問其故荅曰我無德量凡見尋常人則據術而言見  
貴人則畏怖而務爲諛辭故不驗要之惟公則明明  
則通惟私則暗暗則惑怖貴務諛私孰甚焉而安望

其驗哉故曰清明在躬志氣如神言至公也

龜占之法辨龜之九類五色依四時而用之一曰石龜  
二曰泉龜三曰蔡龜四曰江龜五曰洛龜六曰海龜  
七曰河龜八曰淮龜九曰旱龜春用青靈夏用赤靈  
秋用白靈冬用黑靈四季之月用黃靈上員象天下  
有二十八匡法二十八宿骨有六間法六府匡有八  
閒主八卦文有十二柱法十二時故象天地辨萬物  
者矣欲知龜神骨白如銀欲知龜聖看龜千里經正  
欲知龜志看龜十字分四時所灼之體而用之春灼  
後左足夏灼前左足秋灼前右足冬灼後右足三代

而下龜法不傳世人不考古始隨俗占驗如所謂辨五色依四時之占今不復存矣

凡陰陽雜占吉凶悔吝其類有九決萬民之猶豫一曰嫁娶二曰生產三曰曆注四曰屋宅五曰祿命六曰拜官七曰祠祭八曰發病九曰殯葬秦漢奉常屬官有太卜令丞武帝置太博士後漢靈臺待詔有龜卜三人易筮三人隋有男巫十六人女巫八人歷代因之惟國朝設官更不置卜官巫亦不設凡軍國重事猶豫者惟集大臣從長議處重人謀而不恃鬼謀真千古特見哉

凡七章

本星相之術

世有以生年月日占人禍福利害貴富貧賤多有驗者其術數百年來不廢人知其驗不知其所以驗緣貴富正直之人鍾天地精英之氣而來其降生必值時月之無衝克與星宿之生旺者若貧賤兇邪之人出世其氣類所召必值年月之衝搏與星宿之衰敗其理有固然者術士假此窺測一二以干衣食若必欲泥此求某日陞轉何官某日得何喜慶此又不智之甚矣

支干之相因有盡世人之生育無窮執此以論殆有遺  
於所推之外者且人之出處不同或先富後貧或先  
貧後富或先榮今辱或先辱今榮如此等類萬有不  
齊須當審其人如農工商賈之異業因其地如南弱  
北強之異氣任其運如治亂否泰之異時如世方尚  
武則支干之剛勁者得地如世方尚文則支干之俊  
逸者得用如世不諱鯁直則時日之正直者得進如  
世不行賄賂則命運之廉潔者得通此皆變通以濟  
術之所不及否則未見其能驗也

今之星相者率揣摩人情曲中所欲遇年少之子多浮

許其科目年高之士每溢加其壽考因人情之不足  
多言前蹇而後興因世路之速化多言暮遷而朝轉  
或言時下之災迭則少有啾唧者必咤其能或言日  
後之興隆則過有求望者必喜其驗已身骭髀者則  
許子嗣之將興老境淒涼者則斷六親之無倚大抵  
曲爲辭說以苟贈遺非有意求其言之中也明理君  
子諒不爲其所蔽焉

星相之術傳流有自間多獲中者然不驗者嘗多於所  
驗世所咤奇中者如天綱柳莊之流計其生平亦不  
數數也予嘗聞星家之奇應多在五星相家之奇應

多在氣色但五星流轉在天而欲應一人之禍福氣色隱見在面而欲兆外來之災祥恐無此理矣雖中亦不能一一符合也故君子不能無信不能盡信惟信理不惑斯可以語知命君子

有心無相相逐心生有相無心相隨心滅此語道盡相術骨髓故知心正於內驗形於外心亂於中相變於外甚可畏也然此亦是實理亦不難知假如人心一怒則面見怒容身顯怒形人心一喜則面有喜色身見喜形姦邪僞妄之積豈有不形見於外者乎生於心見於政發於事徵於福極有必然者矣君子修德

俟命積德之至亦能改天命焉

相術之行久矣荀子作非相篇譏之經今又更千五百  
餘年矣術竟可信乎曰有是術必有是理術載理而  
行者也若其無理術何能行相術之始其理微妙又  
有許負陳搏諸人行之故足稱仙術其所窺在人之  
骨法在人之精神在人之器宇在人之態度合何物  
像合何形局故言富貴貧賤壽夭如隔牆見鍼種種  
俱驗以其所窺幽遠也若卽相人之肥瘦以占貧富  
輪人之部位以斷吉凶此則棄本而逐末沿流而忘  
源者耳

袁柳莊 國朝最稱善相嘗得異僧傳授相法識 文  
皇於潛邸一時金紫造謁者無虛日所言災祥禍福  
神驗且皆勉之曰使吉者能力行孝義則福益增凶  
者能力行孝義則禍可消每相人未嘗不以是教詔  
之官至太常丞噫袁公所傳者術也其亦幾進於道  
哉

存乎人者莫良於眸子此一語足爲相術之宗蓋緣心  
地邪正徵見於眸子之明眊性度之善惡顯露於眸  
子之兇慈而福祿之久近饗用之豐嗇恒必由之若  
又能聽其心聲之發其聲洪遠可卜其稟之深厚其

聲嘶殺可卜其受之淺薄昔人聞聲而知必滅若敖氏未朞而知其真英物所謂人焉廋哉者豈欺我哉人無聖智賢愚莫不各具二儀三光流峙走飛之像故觀其偏正廣狹清濁昏朗可以別貴賤定壽夭至於五色隱約見於皮膚之內而能灼見其災祥禍福吉凶之徵者此非精於鑒別者不能然吉凶禍福之機形之於五色五色之變萌之於其心心存乎吉則紅黃之色著而福集心存乎凶則青黑之色著而禍生焉常人得吉相則躍躍而有喜得凶相必戚戚而懷懼能戚戚而懷懼則必力行善道足以轉禍爲福若

恃其吉而肆爲不善則轉福爲禍亦無難者是故無一定之相而有一定之心

世有異人爲一代建立鴻業開啓泰運其軀幹肢體必與衆異修長俊偉遐福眉壽非人所能企望其姦僞讒佞必有回顧隱伏之態世人稍有知識者亦能辨之不必擅相術於世者也然此必旣登用而後可以揣摩若塵埃中識天子宰相則人皆物色之矣今世術人多言以冀獲中脰合無舛者千百中一人耳世遂舉一而信百何哉

人人有定命術士無全知天機難泄露泄露多陰愆謝

靈運欲入遠公社遠公拒之曰子髮黃面與身疾非令終之相靈運怒曰學道在心安以貌耶遠公笑而不荅後果棄市豈非人人有定命乎庾夔家富於財食必列鼎狀貌豐美頤頰開張人謂必爲方伯及魏江陵卒至餓死時有水軍都督褚羅面甚尖危縱理入口竟保衣食而終豈非術士無全知乎要知天機不肯洩露但當任運而行不必苦求前知恐以矜誇而損福

相術可盡非乎曰不可相術可盡信乎曰不可舜嘗重瞳而帝天下矣項羽亦重瞳而霸西楚卒刎烏江李

煜太子目有重瞳自以爲必統一天下不修武備敗  
降於宋以今觀羽爲伯王煜之子爲太子皆有帝王  
之兆而咳下之勿降宋之辱則其所過屠戮不修武  
備取之况自古帝王多矣曷嘗皆重瞳哉臣亦有重  
瞳者沈約字休文左目重瞳腰有紫痣梁武帝受禪  
拜爲尚書僕射後梁康王友敬目重瞳謀作亂梁主  
覺之伏誅魚俱羅相裴雄異目有重瞳隋煬帝忌之  
被誅

凡十二章

本方伎之術

天下之道術衆矣然人無恒心習學不久遂爾灰志多  
不造其閫域而止迄亦無驗若能專志持久則雖始  
好手技終進乎道況所好者道乎君子務其大者遠  
者技術之流雖不探究無傷但非持恒久之心凡百  
事多做不堅固楊龜山三十年兩肘不離案讀書然  
後於道有進異端如達磨亦面壁九年然後成道勤  
苦尤甚今人鹵莽滅裂而耕豈不鹵莽滅裂而報耶  
古今伎倆凡到得妙處駭觀易聽人咤若神不過造於  
極熟而已人品高操得熟卽射虱解牛斲輪弄丸舞  
劍削鑊等事皆入妙境但究竟於自己身中無益耳

若增一分伎倆則妨一分道業此又不可不知

用志不分乃凝於神凡伎藝皆然唐李思訓畫大同殿壁夜聞水聲明皇稱爲通神佳手北齊楊子華畫馬於壁每夕必踉齧長鳴一時號爲畫聖顧愷之畫龍不敢點睛後人強其點睛龍竟飛去此何以故蓋畫者一身精神俱萃於畫故其發見筆端亦能生動如真有僧勸龍眠居士莫學畫馬謂再生必墮馬胎由是龍眠改畫觀音畫更入妙術之不可不慎也如是幻師於虛空中以幻術力化作種種色相如武帝之見李夫人明皇之觀燈廣陵玄宗之翫景西涼皆幻術

也然皆由於武帝明皇玄宗之蠱惑信向然後其術得行若一念持正則幻師亦無能爲昔唐有胡僧善以呪法生死人傳爽云試使呪臣臣必不死後果不驗則知邪不勝正自古而然

邪正殊途勢不兩立正之所至邪不自容譬如日輪照於冰山日固自如冰當自釋昔方謙之清靜自居味道爲樂時所居之方多病山瘡謙之書名與之無不立愈或請其方謙之曰嘗聞心正可以治邪吾居貧無財可施但得誦法輪道德經隨喜衆善慈悲靖惡自謂可以自治亦可治邪如是而已卽此一事邪不

勝正可知

疑有養由基者善射去柳葉百步而射之百發而百中  
左右觀者數千人皆曰善射有一夫立旁曰善可教  
射矣養由基怒曰客安能教我射乎客曰非能教子  
支左紉右也夫去楊葉百步而善之不以善息少焉  
氣衰力勸弓撥矢鉤一發不中者百發盡息噫此旁  
觀之夫蓋隱者也韓彭惜未有以此意語之者

算學不傳久矣唐有算學博士掌教文武官八品以下  
及庶人子之爲生者二分其經以爲之業習九章海  
島孫子五曹張丘建夏侯陽周髀十有五人習綴術

緝古十有五人其記遺三等數亦兼習之孫子五曹  
共限一年業成九章海島共三年張立建夏侯陽各  
一年周髀五經算共一年綴術四年緝古一年其督  
課試舉如三館博士之法近年荆川唐公始講古算  
一學重刊遺書而算學之灰復燼

魂本與體相依附然亦有時而可易曾見附童一術列  
四童子更其衣裝爲馬趙溫關四將式立堂中術士  
書符誦呪如法能使四童中一童漸漸搖動久之跳  
躍如神降狀舞刀劒如素閑者旣定叩以事率隨叩  
而荅叩已則退則見童子呵氣數口而醒問童子童

子不知也及問童子初舞時汝何在曰我自在堂東坐耳則知其體爲鬼所附麗彼不知也所問之事亦不甚中若止令舞劒則一一中節雖老劒士亦咤以爲能其寔童子素不能曉可見邪氣隨在而有但不當倚信耳

唐元宗車駕次華陰上見岳神數里迎謁召諸巫問神何在老巫阿馬婆奏云在路左朱鬢紫衣上至廟見神橐鞬俯伏庭東南大栢樹下又召問巫對如上見上加敬禮天子爲山川百神之主伏道迎謁理固有之老巫之見亦神矣嗚呼巫一也何幸而爲阿馬婆

之巫又何不幸而爲河伯娶婦之巫哉

宋太宗作端拱樓聞董羽善畫龍水召之使畫於壁羽用意精妙半年乃成自謂天下絕筆及太宗引嬪御登樓觀賞無何太子見龍大驚立命汙漫半年工夫一旦無用鄉使皇子不驚董羽恩數豈在明日此其福德淺薄自不能與吉慶會也然則雷轟薦福之事自不足怪矣

荆楚尚鬼有一巫頗聞於鄉其初爲人祀几筵尋常然祈疾健祈歲穰其後几筵甚盛祈穰反是人謂此巫初爲人祀家無甚累又罄誠祈禱昨必散之福應於

外後男女蓄息衣食廣大又不罄誠意昨私於家故  
神不歆其祀福不應於外由是觀之非獨巫也祈晴  
禱雨呼風叱雪凡以術名世者大抵不容一毫私已  
若庸心私已術不靈驗矣

巫覡本以傳神然所傳者類非正神迺靈魂所依附耳  
其言禍福生死貧賤富貴得喪窮通類多不驗蓋巫  
覡歌舞若狂其身中之神遂爲淫厲之氣所著故懸  
斷世情其知識靈慧原只是巫覡之分量尚不能及  
人豈能知人之所不及知者乎余每驗之雖目前咫  
尺之事尚未必應世有信之以追賊犯決疑事鮮有

不爲其所誤者

外事以剛日內事以柔日古未有選擇之法但孟子有  
天時不如地利之語則已有孤虛相王之說矣千古  
以來因襲承用不知其說驗乎不驗乎余謂世人作  
事動衆諸氣所聚多有神明主持其間一遇時日衝  
擊剋搏禍福應之其理良有君子每遇作事須隱約  
簡易不動大衆不眩觀美不爲鬼神之所測識則雖  
不拘時日無傷康節出行多不擇日人告以不利則  
不行曰人旣言則有知鬼神敵之矣如此則知不爲  
鬼神所覷無害也

符籙之說自古有之一人誦大洞真經事鉏下所得金像甚謹三年忽夢所事金像語之曰大洞仙經爾熟記矣大洞法籙爾未知也今授汝治邪魔旣覺枕前得二書一曰大洞籙一曰大洞法因開籙讀之至天騶甲卒一萬人度之句忽風雷晝暝金甲朱綬者無數列前俯而請命其人不覺厲聲謂曰吾要汝等治瘟鬼此鄉某家闔門病瘟爲吾驅來俄頃執鬼使五人出有蒙虎皮者冠雄雞者貌若犬者若烏鴉者若驢馬者所執有水火羽翼釜鑿之具其人怒而叱之將滅其形彼有辭曰弟子等歲運所生歲氣所成所

遊有方所病有人陰譴至者受其殃亦非弟子等敢私也若蒙真官寬貸後遇行瘟見真官符錄所在卽不敢至矣後閭里病瘟者與之符錄皆活然則符錄治病理固有之但當行之以誠信耳

凡十四章